

Thòk-chiá Tâu-su

From Ông Siok-iông

2000 nî 3 gòeh tī Ko-hiông chhī kú-pān ê “Tē 6 kài Sè-kài Tâi-gí bûn-hòa-iâⁿ”, góa chhōa hit chūn tng-teh thák kok-tiong 3 nî ê cha-bó kiáⁿ khi chham-ka, ūi beh chhin-kīn bó-gí, thiaⁿ bó-gí ê siaⁿ-sàu kap bó-gí ê súi.

Chóng-sī ka-kī liên seng-óah iông-gí tō kóng bē liàn-tng, koh-khah bián-kóng chai-bat kúí ê iu-ngá ê Tâi-gí iông-sū. Ū-sī gín-á chiáⁿ bē-giàn kóng/óh ê bīn-chhiuⁿ hō góa khòaⁿ chit ê kha-sng chhiú-nng, sim-koaⁿ thâu mā chiok kan-khó. M̄-koh góa iáu-sī bē sí-sim. Chai-iáⁿ ka-kī bó-gí kóng kah put-tat put-chhit(lóng-sī Hōa-gí lām Hō-ló ōe án-ne), tō kian-sim kiū chìn-pō. Bé Tâi-bûn chheh lâi thák, kap Tâi-bûn Bóng-pò(TBBP) Cháp-chì-siā khai-sí ū chiap-chhiok, ták kī thák Tâi-bûn Thong-sin(TBTS) kap TBBP. Sòa--lòh góan chham-ka thák-chheh-hōe. Bô jōa-kú tō tui A-Hūi(Pian-chiá chù-kái, Tân Hong-hūi) lāu-su óh Tâi-ôan Lô-má-jī thák/siá, chin-kín “ē-hiáu kóng tiòh ē-hiáu siá!” Góan ke chin ū sìn-sim.

Chū án-ne piàⁿ-sí liām thák Tâi-ôan-jī Cháp-chì. Lāi-té chē-chē siá liáu chin chán ê bûn-chiuⁿ, jīn-chin thák, thák chhut-siaⁿ, koh chàì thák!

Bú-á-kiáⁿ chhiâng-chhāi iông Tâi-ôan-jī siá jī-chóa. Góa siá ê tē 1 tiuⁿ jī-chóa, “Lí poe-á khng tī chia sī beh chhī ka-chóah sī--m̄?” Kúí-kang āu, góa siu tiòh chit hāng lé-bút, chocolate, téng-bīn koh kah jī-chóa siá kóng, “ Chiáh khòaⁿ m̄i--leh.”

Sui-bóng siá-liáu ū m̄-tiòh, m̄-koh sim-lāi ū-kàu hoaⁿ-hí--leh. Iông bó-gí kau-tâm í-keng chiáⁿ-chó gún seng-óah kòan-sì, m̄-nā sī án-ne, góa kám-kak su-khó ke-chin hóat-phoat, kám-chêng mā ke-chin chhin-bit.

“ Cheng-bit” kap “Khui-khoah” sī Tâi-ôan-jī hō góa ê khé-sī. Su-khó jú chheng-chhó, chò tãi-chì mā ke khah chim-chiok. Ûi “ Jīn-lūi ê gí-giân sī tē-kiú ê chu-gôan” chit ê sè-kài-koan lâi khòaⁿ, tī Tâi-ôan chit tè tó-sū, lán ài hō bó-gí chhut-thâu-thiⁿ(m̄-sī biát-bông--khi), lán ê kiáⁿ-sun chiaⁿ ū chun-giâm.